

Na osnovu člana 13. Zakona o principima lokalne samouprave u Federaciji BiH („Službene novine Federacije BiH“, broj 49/06 i 51/09) i člana 84. Statuta Općine Stari Grad Sarajevo („Službene novine Kantona Sarajevo“, broj: 20/24) na 38. redovnoj sjednici održanoj dana \_\_\_\_\_ Općinsko vijeće Općine Stari Grad Sarajevo, donosi

**P R A V I L N I K**  
**O STIPENDIRANJU NADARENIH UČENIKA SREDNJIH ŠKOLA I STUDENATA**

**I - OPĆE ODREDBE**

**Član 1.**  
**(Predmet Pravilnika)**

Ovim Pravilnikom utvrđuju se, način i kriteriji stipendiranja nadarenih učenika srednjih škola i studenata koji se nalaze na redovnom školovanju u srednjim i visokoškolskim ustanovama, državljana Bosne i Hercegovine, sa prebivalištem na području Općine Stari Grad Sarajevo, u trajanju od najmanje tri godine do dana prijavljivanja na javni poziv.

**Član 2.**  
**(Aplikant)**

- (1) Aplikanti prema odredbama ovog Pravilnika su:
- a. redovni učenici srednjih škola;
  - b. studenti visokoškolskih ustanova, starosti do 27 godina.

**II – OPĆI KRITERIJI ZA DODJELU FINANSIJSKIH SREDSTAVA ZA REDOVNE UČENIKE SREDNJIH ŠKOLA I REDOVNE STUDENTE VISOKOŠKOLSKIH USTANOVA**

**Član 3.**  
**(Kriteriji za dodjelu finansijskih sredstava)**

- (1) Kriteriji za dodjelu stipendija iz Budžeta Općine Stari Grad Sarajevo nadarenim učenicima i studentima, shodno odredbama ovog Pravilnika su sljedeći:
- a. da su državljani Bosne i Hercegovine;
  - b. da su stanovnici Općine Stari Grad Sarajevo u trajanju od najmanje tri godine do dana ponošenja aplikacije za dodjelu stipendije;
  - c. da redovno pohađaju srednju školu, odnosno visokoškolsku ustanovu sa ostvarenim uspjehom, kako slijedi:

- učenici srednjih škola sa najmanjom prosječnom ocjenom 4,80, a učenici prvog razreda srednje škole koji su u devetom razredu osnovne škole ostvarili prosjek ocjena 4,80 i više.
  - redovni studenti fakulteta/akademija koji prvi put upisuju tekuću studijsku godinu na nekoj od visokoškolskih ustanova ili pridruženih članica univerziteta Sarajevo za fakultete/akademije iz grupacije umjetnosti, društvenih nauka, humanističkih nauka sa najmanjom prosječnom ocjenom 9,00 i studenti fakulteta iz grupacije medicinskih nauka, tehničkih nauka i grupacije prirodno-matematičkih i birotehničkih nauka sa najmanjom prosječnom ocjenom 8,50, a studenti prve godine fakulteta/akademije koji su u četvrtom razredu srednje škole ostvarili prosjek ocjena najmanje 4,80.
- (2) Svi učenici iz tačke a) ovog člana sa prosjekom ocjena 5,0 i učenici prvog razreda srednje škole sa prosječnom ocjenom 5,00 ostvarenom u VI, VII, VIII i IX razredu osnovne škole, te studenti iz tačke b) sa prosjekom ocjena 9,50 i više ostvaruju pravo na dodjelu stipendije - direktan prolaz, bez obzira na ukupan broj bodova, prikupljen na osnovu drugih kriterija po ovom Pravilniku.

### **III - STIPENDIRANJE**

#### **Član 4.**

#### **(Odluka o raspodjeli finansijskih sredstava)**

- (1) Općinski načelnik nakon usvajanja Budžeta za tekuću godinu, a prije raspisivanja Javnog poziva za dodjelu stipendija nadarenim učenicima i studentima donosi Odluku kojom se utvrđuje ukupan iznos finansijskih sredstava koja se planiraju za stipendiranje shodno odredbama člana 2. ovog Pravilnika.
- (2) Ukupna sredstva za stipendiranje procentualno se dodjeljuju za:
- a. redovno školovanje nadarenih učenika u srednjem obrazovanju - 40%;
  - b. redovno školovanje nadarenih studenata na visokoškolskim ustanovama - 60%.

### **IV - SREDSTVA**

#### **Član 5.**

#### **(Iznos sredstava)**

- (1) Stipendije se dodjeljuju za tekuću školsku/akademsku godinu i isplaćuje se za 9 mjeseci u kojim se nastava odvija (septembar-decembar; februar-juni;).
- (2) Visina mjesečne stipendije za nadarene učenike srednjih škola i studente iznosi:
- a) za učenike srednjih škola - 150,00 KM;
  - b) za studente - 200,00 KM.
- (3) Općinski načelnik ima pravo da, u slučaju raspoloživih sredstava u Budžetu, tokom godine mijenja ranije utvrđeni iznos u stavu (2) ovog člana.
- (4) Iznimno od odredbi ovog Pravilnika, za kandidate koji ispunjavaju uslove, a izvan su procenta utvrđenih članom 4. Općinski načelnik na prijedlog Komisije može odobriti stipendiju za te aplikante, ukoliko isti ispunjavaju uslove Pravilnika i ukoliko postoji finansijska mogućnost u Budžetu, slijedeći rang listu.

## V – JAVNI POZIV ZA DODJELU FINANSIJSKIH SREDSTAVA

### **Član 6.** **(Javni poziv)**

- (1) Finansijska sredstva navedena u članu 6. ovog Pravilnika iz Budžeta Općine dodjeljuju se isključivo putem Javnog poziva, koji raspisuje Općinski načelnik.
- (2) Javni poziv iz stava (1) ovog člana se raspisuje najkasnije do 30.11. tekuće godine i ostaje otvoren 15 (petnaest) dana.
- (3) Javni poziv se objavljuje u jednom dnevnom listu i na web stranici Općine Stari Grad Sarajevo.
- (4) Javni poziv iz stava (1) ovog člana priprema i dostavlja Općinskom načelniku Služba za obrazovanje, kulturu, sport i mlade.

### **Član 7.** **(Sadržaj Javnog poziva)**

- (1) Javni poziv obavezno sadrži:
  - Naziv organa koji raspisuje poziv;
  - Osnov ostvarivanja finansijskih sredstava;
  - Spisak dokumentacije koja se obavezno dostavlja uz prijavu;
  - Aplikaciju za prijavu na Javni poziv;
  - Rok za prijavu na javni poziv;
  - Iznos finansijskih sredstava, koja su predviđena za dodjelu stipendija prema odredbama ovog Pravilnika.

### **Član 8.** **(Dokumentacija za Javni poziv)**

- (1) Uz popunjenu aplikaciju koja je sastavni dio Javnog poziva, za prijavu na isti, aplikant je obavezan dostaviti sljedeću dokumentaciju (originale ili ovjerene kopije) kako slijedi:
  1. Uvjerenje o državljanstvu ili Rodni list sa navedenom činjenicom o državljanstvu kandidata za stipendiju ne starije od šest mjeseci;
  2. Uvjerenje o kretanju kandidata za stipendiju ne starije od 30 dana (MUP KS, PU Stari Grad);
  3. Potvrdu o upisu kandidata u tekuću školsku/akademsku godinu, izdatu od nadležne institucije škole/fakulteta sa naznakom da kandidat prvi put upisuje razred/godinu;
  4. Uvjerenje o postignutom uspjehu kandidata za stipendiju u prethodnoj školskoj/akademske godini (za učenike prvog razreda srednje škole svjedočanstvo IX razreda osnovne škole, za studente prve godine studija svjedočanstvo završnog razreda srednje škole (IV razred), za studente viših godina potvrda o prosjeku ocjena za prethodnu godinu studija);
  5. Dokaz o učešću i postignutim rezultatima na općinskom, kantonalnom, federalnom, državnom i međunarodnom takmičenju za prethodnu školsku/akademske godinu, potvrda ili diploma od nadležnih institucija (resorno ministarstvo, strukovni savez...);

6. Dokaz da kandidat ima završenu osnovnu muzičku školu (Uvjerenje o završenoj osnovnoj muzičkoj školi izdato od nadležne institucije);
  7. Dokaz da kandidat ima status perspektivnog sportiste ostvaren u prethodnoj školskoj/akademske godini (Uvjerenje izdato od strane nadležnog ministarstva);
  8. Dokaz da je kandidat bez jednog ili oba roditelja (izvod iz matične knjige umrlih);
  9. Izjava kandidata kojom se daje saglasnost da se njegovi podaci mogu obrađivati u skladu sa Zakonom o zaštiti ličnih podataka, za maloljetne kandidate Izjavu daje roditelj/staratelj i ista treba biti ovjerenam od strane nadležne općinske službe;
  10. Potvrda o otvorenom računu na ime aplikanta.
- (2) Učenici sa prosjekom ocjena 5,00 i učenici prvog razreda srednje škole sa prosječnom ocjenom 5,00 ostvarenom u VI, VII, VIII i IX razredu osnovne škole, te studenti sa prosjekom ocjena 9,50 i više ostvaruju pravo na dodjelu stipendije - direktan prolaz, bez obzira na ukupan broj bodova, prikupljen na osnovu drugih kriterija po ovom Pravilniku, uz obavezno dostavljanje dodatnih validnih dokaza i to:
- Uvjerenje o postignutom uspjehu u šestom, sedmom, osmom I devetom razredu osnovne škole izdato od strane osnovne škole.
- (3) Studenti sa prosjekom ocjena 9,50 u prethodnoj akademskoj godini I više ostvaruju pravo na dodjelu stipendije, bez obzira na ukupan broj bodova ostvaren na osnovu drugih kriterija uz obavezno dostavljanje dodatnih validnih dokaza i to:
- Uvjerenje o postignutom uspjehu u prethodnoj akademskoj godini izdato od strane visokoškolske ustanove.

## **VI - KOMISIJA ZA POSTUPANJE PO APLIKACIJAMA**

### **Član 9. (Komisija)**

- (1) Općinski načelnik nakon usvajanja Budžeta za tekuću godinu, te donošenja Odluke iz člana 5., a prije raspisivanja Javnog poziva iz člana 7. ovog Pravilnika imenuje Komisiju za postupanje po aplikacijama na Javni poziv za dodjelu stipendija nadarenim učenicima srednjih škola i nadarenim studentima visokoškolskih ustanova.
- (2) Komisija se imenuje na period od raspisivanja Javnog poziva do okončanja procedure izbora kandidata i broji: 5 (pet) članova, od kojih je jedan predsjednik Komisije. Komisiju čine (3) tri člana koji su državni službenici i (2) dva člana koji su predstavnici Općinskog vijeća Stari Grad Sarajevo.
- (3) Komisija ima zadatak da:
  - Pregleda sve aplikacije sa dostavljenom dokumentacijom;
  - Aplikacije uz koje nije dostavljena obavezna dokumentacija iz člana 9. ovog Pravilnika, odbacuje kao da nisu ni podnesene i o istom obavještava aplikanta pismenim putem;
  - Aplikacije koje ispunjavaju kriterije utvrđene ovim Pravilnikom, Komisija dostavlja Općinskom načelniku na odobravanje, uz prijedlog.

## VII - KRITERIJI ZA DODJELU STIPENDIJA

### Član 10. (Dodatni kriteriji)

(1) Osnovni kriteriji za dodjelu stipendija je rezultat postignut u učenju u prethodnoj školskoj/akademske godini, dok su dodatna mjerila, koja se utvrđuju na osnovu rezultata postignutih na takmičenjima sljedeći:

Bodovi po osnovu rezultata u učenju:

- a) Za nadarene učenike prvog razreda srednje škole prosječna ocjena u završnom razredu osnovne škole zaokružena na dvije decimale i pomnožena sa 9 (prosječna ocjena x 9) bodova;
- b) Za nadarene učenike viših razreda srednjih škola prosječna ocjena u prethodnoj školskoj godini zaokružena na dvije decimale i pomnožena sa 10 (prosječna ocjena x 10) bodova;
- c) Za nadarene studente na prvoj godini prosječna ocjena u četvrtom razredu srednje škole zaokružena na dvije decimale i pomnožena sa 12 (prosječna ocjena x 12);
- d) Za nadarene studente viših godina fakulteta/akademija prosječna ocjena u prethodnoj godini studija zaokružena na dvije decimale i pomnožena sa 16 (prosječna ocjena x 16) bodova.

(2) Po osnovu rezultata postignutih na takmičenjima:

Od 1. do 3. mjesta;

- a) općinsko takmičenje od 1 do 3 boda;
- b) kantonalno takmičenje od 3 do 5 bodova;
- c) federalno takmičenje od 6 do 8 bodova;
- d) državno takmičenje od 9 do 11 bodova;
- e) međunarodno takmičenje od 13 do 15 bodova.

Za učešće na takmičenjima:

- a) kantonalno takmičenje 1 bod,
- b) federalno takmičenje 2 boda,
- c) državno takmičenje 3 boda,
- d) međunarodno takmičenje 4 boda.

(3) Osvojeno mjesto, isključuje bodove po osnovu učešća.

(4) Bodovi po osnovu završenog dodatnog obrazovanja i dostignuća u sportu:

- a) Kandidat koji ima završenu osnovnu muzičku školu – 1 bod;
- b) Učenik koji ima status perspektivnog sportiste Kantona Sarajevo u prethodnoj školskoj godini – 1 bod.

(5) Po osnovu otežanih uvjeta života:

- a) učenik ili student bez jednog roditelja – 7 bodova;
- b) učenik ili student bez oba roditelja – 10 bodova.

**Član 11.**  
**(Prednost)**

Ukoliko prijavljeni kandidati imaju jednak broj bodova, prednost će imati onaj kandidat koji ima više bodova po osnovu rezultata u učenju.

**Član 12.**  
**(Obavijest)**

- (1) Svaki učesnik u javnom pozivu mora biti pismeno obaviješten o rezultatima izbora najkasnije u roku od 30 dana od dana izbora, tačnije objavljivanja preliminarne liste aplikanata-korisnika općinske stipendije za nadarene učenike srednjih škola i studente.
- (2) Nezadovoljni učesnik u javnom pozivu može podnijeti prigovor za zaštitu svojih prava Drugostepenoj stručnoj komisiji Općinskog vijeća u roku od 8 dana od prijema obavještenja
- (3) Odluka Drugostepene komisije Općinskog vijeća je konačna.

**VIII – ODLUKA O DODJELI FINANSIJSKIH SREDSTAVA**

**Član 13.**  
**(Akt o dodjeli finansijskih sredstava)**

- (1) Općinsko vijeće na osnovu prijedloga Komisije iz člana 10. ovog Pravilnika donosi Odluku o dodjeli stipendija nadarenim učenicima i studentima kojom odobrava dodjelu stipendija aplikantima u skladu s članom 5. ovog Pravilnika.
- (2) Ukoliko bilo koji od kandidata dobije stipendiju od nekog drugog fonda ili institucije, po istom osnovu briše se sa bodovne liste, s tim da sljedeći kandidat sa bodovne liste dobiva općinsku stipendiju.

**Član 14.**  
**(Ugovor)**

- (1) Na osnovu Odluke Općinskog načelnika, sa izabranim kandidatima zaključuje se ugovor o dodjeli stipendije kojim se regulišu međusobna prava i obaveze učenika/studenta i Općine Stari Grad Sarajevo.
- (2) Ugovor potpisuje student/učenik, njegov roditelj/staratelj i Općinski načelnik u ime Općine Stari Grad Sarajevo.
- (3) Pravo na stipendiju po ovom Pravilniku može ostvariti jedan ili više učenika/studenata istog domaćinstva.

**Član 15.**  
**(Obustava stipendije)**

- (1) Pravo Općinskog načelnika je da obustavi isplatu stipendije učeniku/studentu ukoliko:
  - a) napusti redovno školovanje;

- b) izgubi pravo na dalje školovanje iz neopravdanih razloga;
  - c) se utvrdi da prima stipendiju po istom osnovu;
  - d) promjeni adresu stanovanja.
- (2) U slučajevima predviđenim u stavu (1) ovog člana, potpisnik Ugovora o stipendiranju dužan je da vrati sav iznos sredstava Općini Stari Grad Sarajevo, najkasnije do kraja tekuće školske/akademske godine za koju je primio stipendiju po osnovu ovog Pravilnika.

## **IX – PRELAZNE I ZAVRŠNE ODREDBE**

### **Član 16.**

(Stupanje na snagu Pravilnika)

Ovaj Pravilnik stupa na snagu osmog dana od dana objave u „Službenim novinama Kantona Sarajevo“.

### **Član 17.**

(Prestanak važenja)

Stupanjem na snagu ovog Pravilnika prestaje da važi Pravilnik o stipendiranju nadarenih učenika i studenata Općine Stari Grad Sarajevo („Službene novine Kantona Sarajevo“, broj: 28/19. 31/21. 44/22. i 7/23.).

**PREDSJEDAVAJUĆI  
OPĆINSKOG VIJEĆA STARI GRAD  
SARAJEVO**

**Seid Škaljić**

Broj: 02-45-\_\_\_\_/24  
Sarajevo, juni 2024. godine

## O B R A Z L O Ž E N J E

Pravni osnov za donošenje Pravilnika o stipendiranju nadarenih učenika srednjih škola i studenata sadržan je u preambuli akta. Povećan broj zahtjeva za ostvarivanje prava na stipendiranje nadarenih učenika srednjih škola i studenata stanovnika Općine Stari Grad Sarajevo, a koji se odnose na nadležnosti propisane Statutom Općine Stari Grad Sarajevo u oblasti brige o djeci, obrazovanju i odgoju, nameće obavezu utvrđivanja jasnih kriterija za ostvarivanje prava na dodjelu stipendija za nadarene učenike srednjih škola i nadarene studente. S tim u vezi, Općinski načelnik na osnovu mnogobrojnih zahtjeva stanovnika Općine donosi Pravilnik o stipendiranju nadarenih učenika srednjih škola i studenata.

Ovim Pravilnikom regulisano je stipendiranje nadarenih učenika srednjih škola i studenata, te kontrola izdvajanja sredstava iz Budžeta Općine Stari Grad Sarajevo .

Shodno takvim opredjeljenjima, određeno je da Služba za obrazovanje, kulturu, sport i mlade u utvrđenom roku pripremi prijedlog naprijed pomenutog Pravilnika.

Pravilnikom je predviđeno ukupno 9 (devet) poglavlja, na način kako slijedi:

- I- Opće odredbe;
- II- Opći kriteriji za dodjelu finansijskih sredstava za redovne učenike srednjih škola i nadarene redovne studente visokoškolskih ustanova;
- III- Stipendiranje;
- IV- Sredstva;
- V- Javni poziv za dodjelu finansijskih sredstava;
- VI- Komisija za postupanje po aplikacijama;
- VII- Kriteriji za dodjelu stipendija;
- VIII- Odluka o dodjeli finansijskih sredstava;
- IX- Prelazne i završne odredbe.

Finansijska sredstva za ove namjene planirana su u Budžetu Općine Stari Grad Sarajevo za 2024. godinu.

**Predlagač:**

Općinski načelnik

Putem Službe za obrazovanje, kulturu, sport i mlade